

Rheoliadau drafft a osodwyd gerbron Cynulliad Cenedlaethol Cymru o dan adran 187(2)(e) o Ddeddf Rheoleiddio ac Arolygu Gofal Cymdeithasol (Cymru) 2016, i'w cymeradwyo drwy benderfyniad gan Gynulliad Cenedlaethol Cymru.

OFFERYNNAU STATUDOL
CYMRU DRAFFT

2017 Rhif (Cy.)

**GOFAL CYMDEITHASOL,
CYMRU**

**Rheoliadau Gwasanaethau
Rheoleiddiedig (Cofrestru) (Cymru)
2017**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn wedi eu gwneud o dan Ddeddf Rheoleiddio ac Arolygu Gofal Cymdeithasol (Cymru) 2016 ("y Ddeddf") ac maent yn gymwys o ran Cymru.

Mae adran 2 o'r Ddeddf yn diffinio termau allweddol gan gynnwys yr hyn a olygir wrth "gwasanaeth rheoleiddiedig". Mae Pennod 2 o Ran 1 o'r Ddeddf yn nodi swyddogaethau Gweinidogion Cymru mewn perthynas â chofrestru personau sy'n darparu gwasanaethau rheoleiddiedig, gan gynnwys darpariaeth ynghylch amrywio cofrestriadau.

Mae'r Rheoliadau hyn yn sefydlu'r gofynion ar gyfer cofrestru gwasanaeth cartref gofal; gwasanaeth llety diogel; gwasanaeth canolfan breswyl i deuluoedd; gwasanaeth mabwysiadu; gwasanaeth maethu; gwasanaeth lleoli oedolion; gwasanaeth eirioli a gwasanaeth cymorth cartref.

Mae adran 6(1) o'r Ddeddf yn nodi'r wybodaeth y mae rhaid ei chynnwys mewn cais i gofrestru fel darparwr gwasanaeth mewn cysylltiad â gwasanaeth rheoleiddiedig. Mae adran 6(1)(d) yn bŵer i Weinidogion Cymru i ragnodi gwybodaeth ychwanegol y mae rhaid ei chynnwys mewn cais i gofrestru. Mae rheoliad 3 a'r Atodlen yn pennu'r wybodaeth ychwanegol a'r dogfennau sydd i gael eu darparu gan ymgeisydd sy'n gwneud cais i gofrestru.

Mae adran 6(2) o'r Ddeddf yn darparu bod rhaid i'r cais i gofrestru fod ar y ffurf ragnodedig. Mae rheoliad 4 yn gwneud darpariaeth sy'n ei gwneud yn ofynnol i gais gael ei wneud drwy gwblhau ffurflen ar y dudalen berthnasol o wefan Llywodraeth Cymru.

Mae adran 11(1) o'r Ddeddf yn nodi'r amgylchiadau pan fo rhaid i ddarparwr gwasanaeth wneud cais i amrywio cofrestriad. Mae is-adran (3) yn nodi'r wybodaeth y mae rhaid ei chynnwys mewn cais i amrywio cofrestriad. Mae adran 11(3)(a)(iii) yn galluogi Gweinidogion Cymru i ragnodi gwybodaeth arall y mae rhaid ei chynnwys mewn cais i amrywio cofrestriad. Mae rheoliadau 5 i 8 yn pennu'r wybodaeth a'r dogfennau sydd i gael eu darparu mewn cais i amrywio cofrestriad.

Mae rheoliad 5 a'r Atodlen yn nodi'r wybodaeth bellach sy'n ofynnol mewn cysylltiad â chais i amrywio a wneir yn unol ag adran 11(1)(a)(i) a (ii) o'r Ddeddf – hynny yw pan fo darparwr naill ai yn dymuno darparu gwasanaeth rheoleiddiedig nad yw'r darparwr eisoes wedi ei gofrestru i'w ddarparu neu pan fo darparwr yn dymuno darparu gwasanaeth rheoleiddiedig mewn man, o fan neu mewn perthynas â man nad yw eisoes wedi ei bennu yng nghofrestriad y darparwr mewn perthynas â'r gwasanaeth hwnnw.

Mae rheoliad 6 yn nodi'r wybodaeth bellach sy'n ofynnol mewn cysylltiad â chais i amrywio a wneir yn unol ag adran 11(1)(a)(iii) o'r Ddeddf – hynny yw pan fo darparwr gwasanaeth yn dymuno peidio â darparu gwasanaeth rheoleiddiedig mwyach.

Mae rheoliad 7 yn nodi'r wybodaeth bellach sy'n ofynnol mewn cysylltiad â chais i amrywio a wneir yn unol ag adran 11(1)(b) o'r Ddeddf – hynny yw pan fo darparwr gwasanaeth yn dymuno i amod a osodir o dan adran 7(3)(b), 12(2) neu 13(1) o'r Ddeddf gael ei amrywio neu ei ddileu.

Mae rheoliad 8 yn nodi'r wybodaeth bellach sy'n ofynnol mewn cysylltiad â chais i amrywio a wneir yn unol ag adran 11(1)(c) o'r Ddeddf – hynny yw pan fo darparwr gwasanaeth yn dymuno dynodi unigolyn cyfrifol gwahanol mewn cysylltiad â man neu y mae'n ofynnol iddo ddynodi unigolyn cyfrifol oherwydd nad oes unigolyn o'r fath wedi ei ddynodi mewn cysylltiad â man y mae'r darparwr yn darparu gwasanaeth rheoleiddiedig ynddo, ohono neu mewn perthynas ag ef.

Mae adran 11(3)(b) o'r Ddeddf yn darparu bod rhaid i gais i amrywio cofrestriad fod ar y ffurf ragnodedig. Mae rheoliad 9 yn gwneud darpariaeth sy'n ei gwneud yn ofynnol i gais i amrywio gael ei wneud drwy gwblhau ffurflen ar y dudalen berthnasol o wefan Llywodraeth Cymru.

Mae adran 11(2) o'r Ddeddf yn gosod dyletswydd ar Weinidogion Cymru i ragnodi mewn rheoliadau derfyn amser y mae rhaid cyflwyno cais i amrywio cofrestrriad darparwr ynddo o dan amgylchiadau pan na fo unigolyn cyfrifol wedi ei ddynodi mewn cysylltiad â man y mae'r darparwr yn darparu gwasanaeth rheoleiddiedig ynddo, ohono neu mewn perthynas ag ef. Mae rheoliad 10 yn rhagnodi'r terfyn amser hwnnw fel 28 o ddiwrnodau o'r dyddiad pan na fo unigolyn sydd wedi ei ddynodi'n unigolyn cyfrifol mewn cysylltiad â'r gwasanaeth rheoleiddiedig neu'r man y darperir y gwasanaeth rheoleiddiedig ynddo, ohono neu mewn perthynas ag ef.

Ystyriwyd Cod Ymarfer Gweinidogion Cymru ar gynnal Aseidiadau Effaith Rheoleiddiol mewn perthynas â'r Rheoliadau hyn. O ganlyniad, ystyriwyd nad oedd yn angenrheidiol cynnal aseiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn.

NEU

Ystyriwyd Cod Ymarfer Gweinidogion Cymru ar gynnal Aseidiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd aseiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Yr Adran Iechyd a Gwasanaethau Cymdeithasol, Llywodraeth Cymru, Parc Cathays, Caerdydd, CF10 3NQ.

Rheoliadau drafft a osodwyd gerbron Cynulliad Cenedlaethol Cymru o dan adran 187(2)(e) o Ddeddf Rheoleiddio ac Arolygu Gofal Cymdeithasol (Cymru) 2016, i'w cymeradwyo drwy benderfyniad gan Gynulliad Cenedlaethol Cymru.

OFFERYNNAU STATUDOL
CYMRU DRAFFT

2017 Rhif (Cy.)

**GOFAL CYMDEITHASOL,
CYMRU**

**Rheoliadau Gwasanaethau
Rheoleiddiedig (Cofrestru) (Cymru)
2017**

Gwnaed ***

Yn dod i rym ***

Mae Gweinidogion Cymru, drwy arfer y pwerau a roddir gan adrannau 6(1)(d), 6(2), 11(2), 11(3)(a)(iii), 11(3)(b) ac adran 187(1)(b) o Ddeddf Rheoleiddio ac Arolygu Gofal Cymdeithasol (Cymru) 2016(1), yn gwneud y Rheoliadau a ganlyn:

RHAN 1

CYFFREDINOL

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Gwasanaethau Rheoleiddiedig (Cofrestru) (Cymru) 2017 a deuant i rym ar.....

(2) Mae'r Rheoliadau hyn yn gymwys o ran Cymru.

Dehongli

2. Yn y Rheoliadau hyn—

(a) mae i "awdurdod lleol" ("*local authority*") yr un ystyr ag yn adran 189 o'r Ddeddf;

mae i “Bwrdd Iechyd Lleol” (“*Local Health Board*”) yr un ystyr ag yn adran 189 o’r Ddeddf;

mae “corff corfforaethol” (“*body corporate*”) yn cynnwys partneriaeth atebolrwydd cyfyngedig a sefydlir o dan adran 1 o Ddeddf Partneriaethau Atebolrwydd Cyfyngedig 2000(1);

mae i “cymdeithas fabwysiadu” yr un ystyr ag “adoption society” yn adran 2 o Ddeddf Mabwysiadu a Phlant 2002(2);

mae i “darparwr gwasanaeth” (“*service provider*”) yr ystyr a roddir gan adran 3(1)(c) o’r Ddeddf;

ystyr “defnyddiwr gwasanaeth” (“*service user*”) yw person y darperir gwasanaeth rheoleiddiedig iddo;

ystyr “y Ddeddf” (“*the Act*”) yw Deddf Rheoleiddio ac Arolygu Gofal Cymdeithasol (Cymru) 2016;

mae i “gwasanaeth mabwysiadu” (“*adoption service*”) yr un ystyr ag yn adran 2 o’r Ddeddf ac Atodlen 1 iddi;

ystyr “partneriaeth” (“*partnership*”) yw partneriaeth a sefydlir o dan adran 1 o Ddeddf Partneriaeth 1890(3);

ystyr “person” (“*person*”) yw unigolyn neu sefydliad;

ystyr “sefydliad” (“*organisation*”) yw partneriaeth neu gorff corfforaethol, ond yn achos cymdeithas fabwysiadu sy’n gwneud cais i gael ei chofrestru fel gwasanaeth mabwysiadu, ystyr “sefydliad” yw corff corfforaethol;

mae i “unigolyn cyfrifol” (“*responsible individual*”) yr ystyr a roddir gan adran 21(1) o’r Ddeddf;

ystyr “ymgeisydd” (“*applicant*”) yw person sy’n gwneud cais i Weinidogion Cymru i gael ei gofrestru i ddarparu gwasanaeth neu wasanaethau rheoleiddiedig yn unol ag adran 6 o’r Ddeddf;

(b) mae unrhyw gyfeiriad at adran yn gyfeiriad at adran o’r Ddeddf.

(1) 2000 p. 12.
(2) 2002 p. 38.
(3) 1890 p. 39.

RHAN 2

Cais i Gofrestru fel Darparwr Gwasanaeth

Yr wybodaeth a'r dogfennau sydd i gael eu darparu gan ymgeisydd

3. Rhaid i berson sy'n dymuno darparu gwasanaeth rheoleiddiedig⁽¹⁾, yn ychwanegol at yr wybodaeth a nodir yn adran 6(1)(a) i (c), ddarparu i Weinidogion Cymru y canlynol—

- (a) yr wybodaeth a restrir yn Rhan 1 o'r Atodlen;
a
- (b) y ddogfennaeth a restrir yn Rhan 2 o'r Atodlen.

Ffurf y cais

4. Rhaid gwneud cais i gofrestru fel darparwr gwasanaeth drwy gwblhau'r ffurflen sy'n ymddangos ar y dudalen berthnasol o wefan Llywodraeth Cymru a sefydlir at ddibenion hysbysu ymgeiswyr am y weithdrefn ar gyfer cofrestru o dan Ran 1 o'r Ddeddf.

RHAN 3

Cais i amrywio cofrestriad fel darparwr gwasanaeth

Yr wybodaeth a'r dogfennau sydd i gael eu darparu gan ddarparwr gwasanaeth i amrywio cofrestriad – adran 11(1)(a)(i) a (ii)

5. Rhaid i gais i amrywio cofrestriad a wneir yn unol ag adran 11(1)(a)(i) neu (ii), yn ychwanegol at yr wybodaeth a nodir yn adran 11(3)(a)(i) a, phan fo'n briodol, adran 11(3)(a)(ii), gynnwys y canlynol—

- (a) yr wybodaeth a restrir yn Rhan 1 o'r Atodlen;
a
- (b) y ddogfennaeth a restrir yn Rhan 2 o'r Atodlen.

Yr wybodaeth a'r dogfennau sydd i gael eu darparu gan ddarparwr gwasanaeth ar gyfer amrywio – adran 11(1)(a)(iii) a (iv)

6.—(1) Rhaid i gais i amrywio cofrestriad a wneir yn unol ag adran 11(1)(a)(iii) neu (iv), yn ychwanegol at yr wybodaeth a nodir yn adran 11(3)(a)(i), gynnwys y canlynol—

- (a) y dyddiad effeithiol arfaethedig;

(1) *Gweler* adran 2 o'r Ddeddf ac Atodlen 1 iddi i gael y diffiniad o "gwasanaeth rheoleiddiedig".

- (b) y rheswm dros wneud y cais;
- (c) datganiad ynghylch sut y mae'r darparwr gwasanaeth yn bwriadu parhau i gydymffurfio â [rheoliadau adran 27] hyd nes y bydd y gwasanaeth yn peidio â chael ei ddarparu;
- (d) manylion unrhyw hysbysiad a roddir ynghylch y cais arfaethedig i amrywio i—
 - (i) defnyddwyr y gwasanaeth;
 - (ii) yr awdurdod lleol y darperir y gwasanaeth rheoleiddiedig o fewn ei ardal;
 - (iii) y Bwrdd Iechyd Lleol y darperir y gwasanaeth rheoleiddiedig o fewn ei ardal;
 - (iv) unrhyw berson arall;
- (e) pan fo'r darparwr gwasanaeth yn gwneud cais i amrywio'r cofrestriad lai na 3 mis cyn y dyddiad effeithiol arfaethedig, adroddiad ynghylch a yw'r gwasanaeth rheoleiddiedig neu'r man y darperir y gwasanaeth rheoleiddiedig ynddo, ohono neu mewn perthynas ag ef wedi peidio â bod yn ariannol hyfyw neu'n debygol o beidio â bod yn ariannol hyfyw o fewn y 12 mis nesaf.

(2) At ddiben y rheoliad hwn a rheoliad 7 ystyr “dyddiad effeithiol arfaethedig” yw'r dyddiad y mae'r darparwr gwasanaeth yn gofyn amdano fel y dyddiad pan fo'r amrywiad y gwneir cais amdano i gymryd effaith.

Yr wybodaeth a'r dogfennau sydd i gael eu darparu gan ddarparwr gwasanaeth ar gyfer amrywio – adran 11(1)(b)

7. Rhaid i gais i amrywio cofrestriad a wneir yn unol ag adran 11(1)(b), yn ychwanegol at yr wybodaeth a nodir yn adran 11(3)(a)(i), gynnwys y canlynol—

- (a) y dyddiad effeithiol arfaethedig;
- (b) y rheswm dros wneud y cais;
- (c) manylion unrhyw newidiadau y mae'r darparwr gwasanaeth yn bwriadu eu gwneud mewn perthynas â'r gwasanaeth rheoleiddiedig o ganlyniad i'r cais i amrywio neu ddileu, gan gynnwys manylion ynghylch—
 - (i) unrhyw newidiadau strwythurol arfaethedig i unrhyw fangre a ddefnyddir ar gyfer darparu'r gwasanaeth rheoleiddiedig;
 - (ii) unrhyw staffio, cyfleusterau neu gyfarpar ychwanegol neu newidiadau o ran rheoli sy'n ofynnol i sicrhau bod y newidiadau arfaethedig yn cael eu gweithredu;

- (d) unrhyw ddogfennaeth ategol y mae'r darparwr gwasanaeth yn ystyried y bydd yn cynorthwyo Gweinidogion Cymru wrth wneud penderfyniad ynghylch pa un ai i gymeradwyo'r cais i amrywio neu ddileu amod.

Yr wybodaeth a'r dogfennau sydd i gael eu darparu gan ddarparwr gwasanaeth ar gyfer amrywio – adran 11(1)(c)

8. Rhaid i gais i amrywio cofrestrriad a wneir yn unol ag adran 11(1)(c), yn ychwanegol at yr wybodaeth a nodir yn adran 11(3)(a)(i), gynnwys y canlynol—

- (a) yr wybodaeth a restrir ym mharagraffau 8 i 11 o Ran 1 o'r Atodlen;
- (b) y ddogfennaeth a restrir ym mharagraffau 23 i 29 o Ran 2 o'r Atodlen.

Ffurff y cais

9. Rhaid i gais i amrywio cofrestrriad fel darparwr gwasanaeth gael ei wneud drwy gwblhau'r ffurflen sy'n ymddangos ar y dudalen berthnasol o wefan Llywodraeth Cymru a sefydlir at ddibenion hysbysu darparwyr gwasanaethau am y weithdrefn ar gyfer amrywio cofrestrriad o dan Ran 1 o'r Ddeddf.

Terfyn amser y mae rhaid cyflwyno cais i amrywio ynddo pan na fo unigolyn cyfrifol dynodedig

10. Y terfyn amser a ragnodir at ddibenion adran 11(2) yw 28 o ddiwrnodau o'r dyddiad pan na fo unigolyn sydd wedi ei ddynodi'n unigolyn cyfrifol mewn cysylltiad â'r gwasanaeth rheoleiddiedig neu'r man y darperir y gwasanaeth rheoleiddiedig ynddo, ohono neu mewn perthynas ag ef.

Enw

Teitl y Gweinidog, un o Weinidogion Cymru

Dyddiad

RHAN 1

Yr wybodaeth sy'n ofynnol ynghylch yr ymgeisydd pan fo'r ymgeisydd yn unigolyn

1. Enw llawn yr ymgeisydd, ei ddyddiad geni, cyfeiriad cartref, cyfeiriad e-bost a rhif ffôn.

2. Manylion am gymwysterau a phrofiad proffesiynol neu dechnegol yr ymgeisydd i'r graddau bod cymwysterau a phrofiad o'r fath yn berthnasol i ddarparu'r gwasanaeth neu wasanaethau rheoleiddiedig y mae'r ymgeisydd yn gwneud cais i gael ei gofrestru fel darparwr gwasanaeth mewn cysylltiad â hwy.

3. Manylion am hanes cyflogaeth yr ymgeisydd, gan gynnwys enw a chyfeiriad ei gyflogwr presennol ac unrhyw gyflogwyr blaenorol.

4. Manylion am unrhyw fusnes y mae'r ymgeisydd yn ei gynnal neu wedi ei gynnal.

5. Enw a chyfeiriad dau ganolwr—

- (a) nad ydynt yn berthnasol i'r ymgeisydd;
- (b) y mae'r ddau yn gallu darparu geirda ynghylch cymhwysedd yr ymgeisydd i ddarparu'r gwasanaeth neu wasanaethau rheoleiddiedig y mae'r ymgeisydd wedi gwneud cais i'w darparu; ac
- (c) y mae un ohonynt wedi cyflogi'r ymgeisydd am gyfnod o 3 mis o leiaf.

Yr wybodaeth sy'n ofynnol ynghylch yr ymgeisydd pan fo'r ymgeisydd yn sefydliad

6. Pan fo'r sefydliad yn gorff corfforaethol—

- (a) enw'r sefydliad;
- (b) cyfeiriad swyddfa gofrestrdedig y sefydliad;
- (c) pan fo'r sefydliad yn gwmni ac yn is-gwmni i gwmni daliannol—
 - (i) enw a chyfeiriad swyddfa gofrestrdedig y cwmni daliannol;
 - (ii) enw a chyfeiriad unrhyw is-gwmni arall i'r cwmni daliannol hwnnw.

7. Pan fo'r sefydliad yn bartneriaeth—

- (a) enw'r bartneriaeth;
- (b) cyfeiriad prif swyddfa'r bartneriaeth.

Yr wybodaeth sy'n ofynnol mewn cysylltiad â phob person a ddynodir gan yr ymgeisydd i fod yn unigolyn cyfrifol

8. Dyddiad geni, rhif ffôn a chyfeiriad e-bost pob person a ddynodir gan yr ymgeisydd i fod yn unigolyn cyfrifol.

9. Manylion am gymwysterau proffesiynol neu dechnegol pob unigolyn a ddynodir gan yr ymgeisydd i fod yn unigolyn cyfrifol i'r graddau bod cymwysterau a phrofiad o'r fath yn berthnasol i gynorthwyo Gweinidogion Cymru wrth benderfynu ar addasrwydd yr unigolyn neu'r unigolion a ddynodir gan yr ymgeisydd.

10. Manylion ynghylch a yw pob unigolyn a ddynodir gan yr ymgeisydd i fod yn unigolyn cyfrifol—

- (a) wedi cael ei wneud yn fethdalwr ac nad yw wedi ei ryddhau o'r gorchymyn methdal;
- (b) wedi bod yn ddarostyngedig i orchymyn secwestru nad yw wedi ei ddad-wneud;
- (c) yn ddarostyngedig i gyfnod moratoriwm o dan orchymyn rhyddhau o ddyled (o fewn ystyr "debt relief order" yn adran 251A o Ddeddf Ansofedd 1986(1)); neu
- (d) wedi gwneud compownd neu drefniant â chredydwr ac nad yw wedi ei ryddhau mewn cysylltiad â'r compownd neu'r trefniant.

11. Manylion am sut y mae'r ymgeisydd yn ystyried bod pob unigolyn a ddynodir gan yr ymgeisydd yn unigolyn cyfrifol yn gallu cydymffurfio â (cyfeirier at reoliadau a wneir o dan adran 28 NAD YDYNT WEDI EU DRAFFTIO ETO).

Gwybodaeth am y gwasanaeth sydd i gael ei ddarparu

12. Disgrifiad o leoliad y man y bwriedir darparu'r gwasanaeth rheoleiddiedig ynddo, ohono neu mewn perthynas ag ef.

13. Manylion y trefniadau a wneir i gefnogi anghenion diwylliannol, ieithyddol a chrefyddol defnyddwyr y gwasanaeth.

14. Manylion y trefniadau a wneir ar gyfer ymgynghori â defnyddwyr y gwasanaeth ynghylch gweithredu'r gwasanaeth rheoleiddiedig.

15. Manylion y raddfa ffioedd y bwriedir iddynt fod yn daladwy gan ddefnyddwyr y gwasanaeth.

(1) 1986 p. 45.

16. Y dyddiad y bwriedir dechrau darparu'r gwasanaeth neu wasanaethau rheoleiddiedig arno.

Gwybodaeth am y llety

17. Pan fo'r ymgeisydd yn ceisio darparu gwasanaeth cartref gofal(1), gwasanaeth llety diogel(2) neu wasanaeth canolfan breswyl i deuluoedd(3)—

- (a) enw, cyfeiriad a rhif ffôn arfaethedig y fangre y bwriedir darparu'r gwasanaeth rheoleiddiedig ynddi;
- (b) disgrifiad o'r fangre, gan gynnwys datganiad ynghylch a yw'r fangre wedi cael ei hadeiladu'n bwrpasol neu a yw wedi cael ei throsi neu y bwriedir iddi gael ei throsi i'w defnyddio fel gwasanaeth rheoleiddiedig;
- (c) manylion ynghylch a fydd angen caniatâd cynllunio, gwaith adeiladu neu waith trosi ar y fangre y bwriedir darparu'r gwasanaeth rheoleiddiedig ynddi, ac i ba raddau y bydd eu hangen ar y fangre;
- (d) manylion unrhyw fusnes arall sy'n cael ei ddarparu neu a fydd yn cael ei ddarparu yn yr un fangre y bwriedir darparu'r gwasanaeth rheoleiddiedig ynddi;
- (e) manylion unrhyw ofal iechyd (gan gynnwys nyrzio) neu therapi sydd i gael ei ddarparu yn y fangre y bwriedir darparu'r gwasanaeth rheoleiddiedig ynddi.

Gwybodaeth am staffio

18. Manylion am y polisiau a'r gweithdrefnau a ganlyn sydd gan yr ymgeisydd mewn cysylltiad â phob gwasanaeth rheoleiddiedig y mae'r ymgeisydd yn gwneud cais i'w ddarparu—

- (a) recriwtio staff;
- (b) goruchwylio staff;
- (c) hyfforddi a datblygu staff; a
- (d) disgyblu staff.

(1) *Gweler* adran 2(1)(a) o'r Ddeddf a pharagraff 1 o Atodlen 1 iddi i gael y diffiniad o "gwasanaeth cartref gofal".

(2) *Gweler* adran 2(1)(b) o'r Ddeddf a pharagraff 2 o Atodlen 1 iddi i gael y diffiniad o "gwasanaeth llety diogel".

(3) *Gweler* adran 2(1)(c) o'r Ddeddf a pharagraff 3 o Atodlen 1 iddi i gael y diffiniad o "gwasanaeth canolfan breswyl i deuluoedd".

RHAN 2

Y dogfennau y mae'n ofynnol i'r ymgeisydd eu darparu

19. Pan fo'r ymgeisydd yn unigolyn—

- (a) tystiolaeth o bwy yw'r person sydd i gynnwys ffotograff;
- (b) tystiolaeth ddogfennol mewn cysylltiad ag unrhyw gymwysterau y mae'r ymgeisydd wedi darparu manylion amdanynt yn Rhan 1, paragraff 2 o'r Atodlen hon;
- (c) o dan amgylchiadau pan fo'r diben y caniateir ei gwneud yn ofynnol cael tystysgrif cofnod troseddol manwl iddo yn dod o fewn rheoliad 5A o Reoliadau Deddf yr Heddlu 1997 (Cofnodion Troseddol) 2002(1), tystysgrif cofnod troseddol manwl a ddyroddir o dan adran 113B o Ddeddf yr Heddlu 1997(2) sy'n cynnwys, pan fo'n gymwys, gwybodaeth am addasrwydd sy'n ymwneud â—
 - (i) plant (o fewn ystyr “suitability information relating to children” yn adran 113BA(2) o Ddeddf yr Heddlu 1997);
 - (ii) oedolion hyglwyf (o fewn ystyr “suitability information relating to vulnerable adults” yn adran 113BB(2) o Ddeddf yr Heddlu 1997);
- (d) mewn unrhyw achos arall, tystysgrif cofnod troseddol a ddyroddir o dan adran 113A o Ddeddf yr Heddlu 1997.

20. Pan fo'r ymgeisydd yn sefydliad, y ddau adroddiad blynyddol a chyfrifon diwethaf, os oes rhai.

21. Mewn cysylltiad â phob ymgeisydd, datganiad o ddiben sy'n cynnwys yr wybodaeth a ganlyn—

- (a) enw'r unigolyn neu'r sefydliad;
- (b) pan fo'r ymgeisydd yn unigolyn, y cyfeiriad cartref;
- (c) pan fo'r ymgeisydd yn sefydliad, cyfeiriad y brif swyddfa neu'r swyddfa gofrestredig;
- (d) enw'r unigolyn a ddynodir fel yr unigolyn cyfrifol yn unol ag adran 6(1)(c);
- (e) datganiad o ystod anghenion y defnyddwyr gwasanaethau y bwriedir darparu'r gwasanaeth neu wasanaethau rheoleiddiedig ar eu cyfer sydd i gynnwys ystod oedran, nifer

(1) O.S. 2002/233.
(2) 1997 p. 50.

a rhyw y defnyddwyr gwasanaethau bwriadedig;

- (f) manylion am ethos y gwasanaeth sydd i gael ei ddarparu, a sut y mae'r ymgeisydd yn bwriadu bodloni'r gofynion ynghylch safon y gofal a'r cymorth mewn perthynas â phob gwasanaeth rheoleiddiedig y mae'r ymgeisydd yn gwneud cais i'w ddarparu yn unol â [cyfeirier at reoliadau a wneir o dan adran 27];
- (g) manylion am strwythur rheoli a staffio arfaethedig y gwasanaeth;
- (h) disgrifiad o'r polisiau a'r gweithdrefnau mewn perthynas â'r canlynol—
 - (i) derbyniadau (gan gynnwys derbyniadau brys);
 - (ii) cwynion;
 - (iii) amddiffyn plant neu amddiffyn oedolion (pa un bynnag sy'n briodol i'r gwasanaeth y mae'r ymgeisydd yn gwneud cais i'w ddarparu);
 - (iv) rheoli ymddygiad (gan gynnwys mesurau rheolaeth ac atal);
 - (v) absenoldebau heb eu hawdurdodi yn achos defnyddwyr y gwasanaeth sy'n blant;
 - (vi) monitro a gwyliadwriaeth;
 - (vii) diogelwch (gan gynnwys diogelu eiddo defnyddwyr y gwasanaeth);
 - (viii) rhagofalon tân ac ymadael mewn argyfwng;
- (i) manylion y ddarpariaeth addysg sydd i gael ei gwneud ar gyfer defnyddwyr y gwasanaeth sy'n blant;
- (j) manylion y cyfleusterau a'r gwasanaethau a fydd ar gael i ddefnyddwyr y gwasanaeth gan gynnwys y canlynol, ond heb fod yn gyfyngedig iddynt—
 - (i) nifer yr ystafelloedd gwely sengl, ystafelloedd gwely a rennir ac ystafelloedd gwely a chanddynt gyfleusterau en suite;
 - (ii) nifer y lolfeydd/ystafelloedd bwyta cymunedol;
 - (iii) nifer y baddonau arbenigol sydd ar gael;
 - (iv) unrhyw le a chyfleusterau yn yr awyr agored y mae gan y preswylwyr fynediad atynt.

22. Mewn cysylltiad â phob ymgeisydd—

- (a) cynllun busnes;

- (b) ac eithrio pan fo'r ymgeisydd yn awdurdod lleol, geirda oddi wrth fanc sy'n mynegi barn ar sefyllfa ariannol yr ymgeisydd;
- (c) tystysgrif yswiriant mewn cysylltiad ag atebolrwydd a all godi mewn cysylltiad â marwolaeth, anaf, atebolrwydd cyhoeddus, difrod neu golled arall;
- (d) manylion am y llif arian rhagamcanol mewn cysylltiad â'r unigolyn neu'r sefydliad sy'n gwneud cais i gael ei gofrestru fel darparwr gwasanaeth.

Y dogfennau sy'n ofynnol mewn cysylltiad â phob unigolyn a ddynodir gan yr ymgeisydd yn unigolyn cyfrifol

23. Tystiolaeth o bwy yw'r person sydd i gynnwys ffotograff.

24. Tystiolaeth ddogfennol o'r holl gymwysterau y mae'r ymgeisydd wedi darparu manylion amdanynt yn Rhan 1, paragraff 9 o'r Atodlen hon.

25. O dan amgylchiadau pan fo'r diben y caniateir ei gwneud yn ofynnol cael tystysgrif cofnod troseddol manwl iddo yn dod o fewn rheoliad 5A o Reoliadau Deddf yr Heddlu 1997 (Cofnodion Troseddol) 2002, tystysgrif cofnod troseddol manwl a ddyroddir o dan adran 113B o Ddeddf yr Heddlu 1997 sy'n cynnwys, pan fo'n gymwys, gwybodaeth am addasrwydd sy'n ymwneud â—

- (a) plant (o fewn ystyr "suitability information relating to children" yn adran 113BA(2) o Ddeddf yr Heddlu 1997);
- (b) oedolion hyglwyf (o fewn ystyr "suitability information relating to vulnerable adults" yn adran 113BB(2) o Ddeddf yr Heddlu 1997).

26. Mewn unrhyw achos arall, tystysgrif cofnod troseddol a ddyroddir o dan adran 113A o Ddeddf yr Heddlu 1997.

27. Datganiad wedi ei lofnodi gan bob person a ddynodir yn unigolyn cyfrifol sy'n cadarnhau—

- (a) ei fod wedi darllen yr wybodaeth a ddarperir gan yr ymgeisydd yn unol â pharagraff 15 ac yn cytuno arni; a
- (b) ei fod wedi darllen ac yn cytuno y gall gydymffurfio â [cyfeirier at reoliadau adran 28].

28. Mewn perthynas ag ymgeisydd sy'n gorff corfforaethol, datganiad wedi ei lofnodi gan bob aelod o'r Bwrdd i'r perwyl ei fod wedi darllen a deall y [cyfeirier at deitl rheoliadau adran 28] a bod y Bwrdd yn bwriadu cefnogi'r unigolyn a ddynodir yn unigolyn

cyfrifol wrth arfer ei ddyletswyddau a nodir yn y Rheoliadau hynny.

29. Mewn perthynas ag ymgeisydd sy'n bartneriaeth, datganiad wedi ei lofnodi gan bob partner i'r perwyl ei fod wedi darllen a deall y [cyfeirir at deitl rheoliadau adran 28] a bod y bartneriaeth yn bwriadu cefnogi'r unigolyn a ddynodir yn unigolyn cyfrifol wrth arfer ei ddyletswyddau a nodir yn y Rheoliadau hynny.

DRAFFT